



Schweizerische Eidgenossenschaft
Confédération suisse
Confederazione Svizzera
Confederaziun svizra

Der Bundesrat
Le Conseil fédéral
Il Consiglio federale
Il Cussegl federal

Communicaziun a las medias

Data : 11.12.2015

Embargo :

Charta europeica da las linguas regiunalas u minoritaras : rapport da la Svizra

Il Cussegl federal ha approvà il sisavel rapport da la Svizra davart l'applicaziun da la Charta europeica da las linguas regiunalas u minoritaras. Quest rapport dat ina survista dal svilup da la politica linguistica en Svizra e focusescha surtut sin la promozion da la plurilinguitad en l'administraziun federala, l'instrucziun da las linguas en scola primara e las novas mesiras da promozion en connex cun la Missiva per la promozion da la cultura 2016–2020.

Il rapport as referescha a la perioda dal 2012 al 2015. El è dividì en traïs parts. L'emprima part preschenta las novas datas statisticas davart il svilup da las linguas en Svizra e davart il svilup dal rom legal. Ella preschenta ultra da quai las sfidas actualas da la politica linguistica. I sa tracta particularmain da l'instrucziun da las linguas naziunalas, da la promozion dal talian e da la lingua e cultura da la minoritat jenica.

La segunda part preschenta las mesiras instradadas da la Svizra per applitgar la Charta e respunda ina seria da dumondas ch'il Cussegl da l'Europa ha fatg a la Svizra en connex cun recumandaziuns dal Comité d'experts. Questa part tracta er la situaziun dal francoprovenzal tenor ina dumonda generala formulada dal Comité d'experts en sia evaluaziun dal rapport precedent.

La terza part preschenta ils rapports dals chantuns Grischun e Tessin davart l'applicaziun da la Charta en connex cun il rumantsch e cun il talian sin lur territoris. Ina survista dal svilup en la legislaziun dals chantuns tant sco las respostas a las recumandaziuns dal Comité d'experts e da ministers dal Cussegl da l'Europa èn cuntegnidas en quella part.

Las finamiras da la Charta èn essenzialmain da gener linguistic e cultural. La finamira principala è da mantegnair e da promover la diversitat linguistica, in dals elements ils pli characteristics da la vita culturala europeica. La Charta vul meigliurar il diever da las linguas regiunalas u minoritaras en las domenas da la scola, da la giustia, da l'administraziun, da las medias, da la cultura e da l'economia. La Charta ha l'intent da promover che las diversas gruppas linguisticas possian far diever da lur linguas. La Svizra ha declerà il rumantsch ed il talian sco linguas regiunalas u minoritaras en il senn da la Charta ed ella renconuscha la lingua jenica ed la lingua jiddica sco linguas en ses territori.

La Svizra ha ratifitgà la Charta europeica da las linguas regiunalas e minoritaras l'onn 1997 ed ella è entrada en vigur il prim d'avrigl 1998. Tenor l'artitgel 15 duain ils stadis signataris

suttametter al Secretari general dal Cussegl da l'Europa periodicamain in rapport davart l'applicaziun da la Charta. L'emprim rapport da la Svizra è vegnì inoltrà al Secretariat general dal Cussegl da l'Europa en settember 1999. Dapi quella giada ha la Svizra redigì mintga trais onns in rapport davart il svilup da l'applicaziun da la Charta.

Infuraziuns : Stéphanie Andrey, Secziun cultura e societad, Uffizi federal da cultura, tel., 058 464 10 69, stephanie.andrey@bak.admin.ch

Autur : Departament federal da l'intern DFI